

Universitäts- und Landesbibliothek Tirol

Franz Schweyger's Chronik der Stadt Hall

Schweyger, Franz

Innsbruck, 1867

Kays. graisige pfärdt

1552 fuer Hall der stat über den Genspüchl und statgraben auff Fump zue graist disen tag. Obrister ditz kriegsvolkh herr Jörg dux von Payrn.

Kaiser Carl wegraisung.

Am 8. Augusti ist der röm. kayser Carl der 5. von Innsprugg durch die stat Hall am abent umb die 4 ur mit allem seinem hoffgsindt, das den ganzen tag durch hat graist, sambt herzog Johann Fridrich zu Saxn auf Schwatz zue disen abent, volgents ins Pairlandt auff Minchen, nachmals der stat Metz zue, so kinig Hainrich von Frankhreich hat eingenumen.

Kaisers gschütz.

Am 9. August ist das gross gschitz am abent von Innsprug zu Hall ankumen und über nacht da pliben, volgents dem kayser zue, 23 gross nottschlangen oder kartaunen, 8 noch grössere, haben 26 ross an ainer puxn zogn. Nachmals 2 grosse maurprecherin, haben an ainer puxn zogen 30 ross. 10 mittlere stuckh. Dise obpemelte stuckh seind des röm. kinig Ferdinand wappen und namen darauff gossen. Mer 11 falckhenedl, so gschraufft seind gwesen auff den rödern, darauff des röm. kaysers Carls wappen. Mit disem gschitz allem ist ain fennle landtsknecht mit gangen. Haben ghört under das regiment obpemeltn Jörgn dux von Payrn. Auch 13 wägen mit kuglen sambt etlichen wägen mit haun und schauflen zum schantzgräben auf Metz.

Kays. graisige pfärdt.

Am 10. August am tag Laurenti seind zu Hall ankumen pey 1200 wälsche graisige pfärdt sambt dem tross. Seind übernacht in der stat und etlichn dörffern glegen, zu morgens in aller früe der kays. majestät zue auf die stat Metz.

Durchzüg der Spännier.

Am 11. August seint mer zu Haal ankumen, so über Malser haid auff Telffs, Zierl seint graist, volgents in stat Haal, 22 fännl Spännier. Seind gschätzt worden sambt dem tross und vil weibern, der merer teütsche schwäwische frauen, pey 13000, der rechtn soldatn pey 7000. Diss kriegsvolkh ist zwo nächte in der stat glegen sambt den dörffern Absom, Milss etc. Es hat vil unrue, wagnuss und verlust der purgerschafft geben, dan alle heüser voll